

E nove tecnulugie s'invitanu in a pratica di a pesca

Cunnisciuti dapoi un pezzu da i piscatori in battellu, i sundadori chì si ponu aduprà da u bordu si vendenu di più dapoi qualchì tempu. Una altra manera di cuncepì a pratica di a pesca à prezzi pè tutti i portafoglii

Tempi fà, aspettava omu cù una canna à piscà guasi l'ore sane da pudè chjappà un pesciu. Parechje volti, un chjappava nimu nunda mancu aspettendu una nottata sana. Ma cù e nove tecnulugie, pare cambiata a diccia è seria da u cantu di u piscadore. In tutti i casi, un s'aspetta più pè nunda! I sundadori elettronichi sò cunnisciuti dapoi un pezzu da i piscatori in battellu

ma pè quelli chì a si provanu da u bordu, un era ancu ghjunta l'idea. Di fatti dipoi qualchì tempu, si hè democratizata l'usanza di sti sundadori. Si trovanu oghje di più in più chjuchi è purteveli da appiccà li à una canna a piscà è lampà li da u bordu da vede s'ellu ci hè u pesciu. Una manera di vede a pesca d'un altru ochju. "Ghjè una altra filusufia di a pesca, spiega Yoann Thomas, un novu

utilizzatore. *À a piazza d'aspettà chì u pesciu passessi davanti à u lamu, preferiscu pruspettà à di per mè è pudè capi a manera di campà di u pesciu. Eppo mi piacenu l'attrazzi elettronichi ch'ellu si trova oghje. Ci hè a pussibilità d'andà più luntanu in a pratica di a pesca.*"

In quantu à i prezzi ci n'hè pè tutti i portafoglii chì vanu da 150 € à più di 1000 € pè i più perfezzionati. Chì certi ponu dettè un pesciu à prechji metri di fondu. "Eiu n'aghju unu pè piscà in sbocchi di fiume o in i lavi. Un aghju micca bisognu di materiale chì vada à 80 metri di fondu. Eppo u meu u m'hà cunsigliatu Pierre-Charles Luzi chì ghjè un piscadore famosu è ricunnisciutu."

Semplicità di funziunamentu

A particolarità di ste nuvità ghjè sopr'à tuttu u fattu ch'ellu sianu facile à aduprà. Pè a maiò parte basta à lampà lu nanzu e aspettà



"À a piazza d'aspettà chì u pesciu passessi davanti à u lamu, preferiscu pruspettà à di per mè è pudè capi a manera di campà di u pesciu", spiega Yoann Thomas / ritrattu la provence



Un sundadore elettronicu.

/ DOCUMENTU CORSE-MATIN

ch'ellu rimandi l'informazione nant'à u telefonu di u piscadore. Dà infurmazione nant'à u fondu, a temperatu-

ra di l'acqua è ancu a taglia di u pesciu s'omu n'hà pigliatu l'abitudine. U fattu si stà chì in certi paesi cum'è i Stati

Uniti, i piscadori n'anu fattu l'attrazzu principale di e so piscate !

PAUL-MATHIEU SANTUCCI